

本朝分省人物考

人物考卷之五十三目錄

浙江金華府二

章懋

趙艮

鄭錡

趙年

王汶

盧格

姜芳

謝愷

黃傳

徐沂

童品

章拯

童俊

潘希曾

王坡

徐讚

盧煦

李滄

應典

張大輪

陸震

唐龍

戚雄

姜綱

邵幽

楊言

胡森

應璋

董遵

附董翬

凌瀚

金江

趙崇善

虞守愚

楊祐

章适

馮亮

程文德

趙祖元

吳百朋

張元諭

吳廉

周煥

李珙

徐用光

胡節

龔曇

戴升

朱助

潘琢

唐熊

黃裳

朱勝

胡榮

王宗聖

朱環

汪灌

徐文敏

胡擇

王晁

陸璣

朱方

王世名

補遺

童存德

趙志臯

陸可教

人物考卷之五十三目錄終

本朝分省人物考卷之五十三

浙江金華府二

章懋

章懋字德懋蘭谿縣人成化丙戌會試第一選翰林院庶吉士授編修甫四十日偕同官黃孔昭莊定山論上元烟火非是謫臨武知縣先是一峰羅倫論首相不當奪情亦謫時稱翰林四諫官毛給諫弘陳御史壯論救拔改南京大理寺評事遷福建按察司僉事三年疏致仕去尹冢宰旻固留不可三詰而終不變時年四十一人以爲難旣歸甘貧守道奉親外閉

門讀書體認實學而言必根志志必先用用必副功  
提挈綱要所得益深士風爲之一變來學者衆至不  
能容當時白沙一峰定山皆極推與弘治十四年南  
北闕祭酒倪冢宰岳起謝公鐸於北懋於南時未終  
制詔虛位以待令吏侍楊守阯常卿李旻署監事十  
六年就官凡所開示若無奇論比論天下古今事及  
五經理道若寸挺撞鐘大小叩應手而鳴有疏勸勤  
聖學重諸令敬天戒隆繼述謹大婚兩乞致仕 溫  
旨免留正德三年三疏請老歸後起南京太常寺卿  
辭進禮部侍郎又辭旣致仕儉壬鼓奸綱常易故縉

紳惟毒在 宗社亦爲之搖獨明炳幾先而憂先在  
位者蓋炳炳然江西之寇陷浙江乃移縣城矮屋三  
間左寢右爨門垣不能備侍御鮮冕張縉給諫徐文  
溥劉蒞時疏舊學者耆德表以風世詔加存問十六年  
世廟入正大統再用言者薦加南京禮部尚書致仕  
報至已在床褥曰噫無以爲報也疾亟與林守有年  
論古今事與姪贊論君大夫保天下國家之本未旦  
故居之前星隕申乃化辛巳除夕也壽八十六仕籍  
幾六十年官僅三考立朝僅四十日城府不見其迹  
者四十餘年卒贈太子少保謚文懿國史稱其志行



高潔自少潛心大業居常不爲異同至臨大事決大  
議則據經援史確乎不易百凡嗜好一不入其心難  
進易退之節世尤高之

趙 良

趙良字時中永康人成化己丑進士授給事中鯁介  
敢言因災異陳謹天戒重國本卹民艱鎮邊境四事  
忤旨杖于廷幾斃是歲宮媵所生子才兩歲左右請  
立爲太子良抗疏力諫止之及 孝廟正位東宮請  
簡正人爲師保以職輔導良滿九年考陞本科都給  
事中先是重臣王越被劾啣之嚙于中官汪直誣以

言事不謫誦四川廬山令弘治改元擢江西按察司  
僉事陞副使卒于官

鄭 錡

鄭錡字威甫號聽菴蘭谿縣人也自幼刻厲學問根  
據理奧博宗子史登成化乙未進士任靖江令專務  
以平易立政德教遺民執母喪歸靖人勒像而尸祝  
之乞恩致仕不復出嘗與楓山同脩蘭谿縣志所著  
有聽菴稿子瓘字溫卿由成化丁酉鄉薦授閩縣訓  
導庚戌登進士令長洲遇事英發言論亦多過激與  
時不諧陞楚雄通判致仕所著有道德經陰符經正

解禮儀纂纂通蛙鳴集等書藏于家

### 趙年

趙年字有年初補蘭邑庠生因湯溪初設縣撥補湯溪縣學生成化甲午領浙江鄉薦登乙未進士授行人屢奉命行祀事于諸王府凡饋遺一無所受在陝西值歲大歉減廩餼爲藩臬諸臣倡以賑民饑全活甚衆陞工部營膳司員外監本部廠宿弊除革殆盡中貴憚之差監蕪湖木稅歲積羨餘且萬金悉歸之公帑代還管理五城九門事執法嚴正不可犯人目之爲趙鐵面云又轉都水司郎中適中貴有希旨

將於衢州府織造金龍絹者業已成年聞之卽抗疏  
極言不可 上允其奏自是中貴伺其闕失弗可得  
誣以鬻所乘馬多索價值下 詔獄終不少屈以求  
免竟坐除名所著有一得稿碌碌集藏于家

王 汶

王汶字允達義烏人少孤思繼家學讀書極勤苦素  
貧能守道自樂登成化戊戌進士第嘗上疏乞就郡  
教授奉忠文公祀不遂乃授中書舍人守正不阿甫  
三載見有進不以道者恥與爲伍遂謝病歸築精舍  
齊山不取累世所藏書讀之若將終身焉弘治改元

本朝名臣傳卷之三  
兵部主事婁性都御史虞瑤交薦於朝遂與翰林檢討陳獻章同被召汶猶力辭侍講學士謝鐸祭酒章懋勉之行逾年始就道至淮病偶增劇未抵京師五十里卒因所居齊山學者稱之曰齊山先生所著有齊山文集若干卷藏于家

### 盧格

盧格字正夫東陽縣人也成化辛丑進士知貴溪廉能有德政丁未夏江西盜起朝命大臣討之以才望檄格率所部民兵以從寬猛適宜兵樂爲用盜平擢監察御史激揚著聲出按廣東以母老辭歸優游林

下數十年恬靜無求尤人所難平生所著有荷亭辯  
論若干卷兄楷字中夫自幼英敏天順壬午以春秋  
中浙江鄉試第一工詞賦入太學與商文毅輅姚彖  
宰夔等爲六會二公亟以倜儻才許焉時祭酒邢讓  
陳鑑司業張業以典簿侵饌錢抵罪楷方歷事中書  
奮欲救之或曰無益且取罪柰何楷曰師生猶父子  
也父旣溺子可懼罪而不號呼以救之乎遂率同監  
百餘人伏闕上奏明三人之枉京師咸高其義可  
方唐之何蕃云卒年三十四所著有可齋集若干卷

姜芳

姜芳字實夫蘭溪縣人領鄉薦第六任廬陵教諭正身帥物懇懇以文章節義爲訓應聘主考於閩人有以私求舉者峻拒之居父母憂起蕭縣九年考績以文章典雅德器純粹書上考陞大理司務正德間時事日非不得復展平素乞休致臨終能自知其期具衣冠坐以待斃自爲墓志

謝愷

謝愷字舜卿義烏人也由歲貢任叙州府推官操履清介訊鞠明允弘治戊申蜀大歉奉勅賑恤多所全活時盜賊縱橫招徠安集民大感悅撫按交薦於

朝命方下以勞卒于官旅視東歸惟救荒誓却金圖  
勸民詩籠鷄說數篋而已所著有石樓山稿

黃傳

黃傳字夢弼號白露蘭溪縣人也生而穎異讀書過  
目輒成誦比長從楓山先生遊遂潛心義理之學以  
名節自礪舉弘治庚戌進士授江陰令江陰稱難治  
傳興學勸禮威強梗惠良善精敏稱神明奉詔當行  
民奏留之三年授御史朝貴聞其風裁相戒歛避不  
久以病歸疾劇無資殯其家人尤之賦詩曰病餐藜  
藿神尤壯卧死溪山鬼亦清所著有白露集及江陰



誌鄭北園嘗贊其志剛而大行方而成心胷開豁貧富不足縈其慮眼界分明邪正不能遁其情文章之技殆將騁飛黃于班馬而義理之學尋流求源亦欲上泝乎朱程惜乎壽年不永竟不遂其平生

徐沂

徐沂字希曾永康人也弘治癸丑進士授刑科給事中彈劾不避權勢時壽寧侯張鶴齡等恃恩冒德及中官李廣矯命干政皆抗章論之改南京工部奏罷歲取蘇州細密苧布福建改機陝西駝絨民稱便焉陞廣東叅議卒于官歸裝惟圖書而已

童品

童品字廷式號慎齋蘭谿縣人也幼與楓山齊名咸  
化甲辰貢於學丙午舉南畿又十年丙辰始登第或  
勸之減年通籍曰吾早學而晚達命也敢爲欺乎初  
授南武庫主事再遷武選員外郎武庫頗有羨餘同  
官以諷之不可取忤僚友不計也有指揮詭厲尚書  
解之曰童員外義理勇也居官與楊廉邵寶蔡清葉  
釗余燠相友善僅兩考遂引年致仕家居十九年以  
讀書喪明不自振而卒所著有周易羽義春秋經傳  
辨疑禮記大旨正蒙發微合章子集金華文獻錄若

于卷

章拯

章拯字以道號樸菴蘭溪縣人其先出浦城宋相章得象之後生時有貳產象形者其祖松坡公喜曰吾家始自丞相得象後是子生有貳象之異此其兆也童子時穎慧絕倫授以句讀數過輒成誦雙瞳炯然亢日光不眩人皆異之伯太宗伯楓山翁授以易學講說輒能潛思究繹至夜分不寐又履繩蹈矩事無巨細咸恂恂不苟爲文章不事險怪下筆滾滾數千言而理自足登弘治辛酉鄉試次年中壬戌春榜釋

禍南宮以外艱歸哀毀骨立乙丑服闋授工部都水  
司主事管理沽頭聞有遺愛旣去而民思之立碑記  
其事正德丁卯改刑部廣東時逆瑾盜政士大夫重  
足不敢出氣拯曰擇禍莫若輕遂以決囚不覆於瑾  
誣以復命遲慢下錦衣獄數月調梧州別駕時夷獠  
數百人叫噪於馬平單騎往諭之開以朝廷大義獠  
遂解散五年瑾敗遂陞南京吏部稽勲主事六年陞  
南兵武選司員外本年陞南車駕郎中時中貴方橫  
多駕馬快船隻上戶紛然受害拯痛裁減之權要莫  
能干以私民賴寧輯以中原盜起力贊大司馬講究

戎政尋改北兵車駕大爲冢宰楊邃菴所知陞廣東  
提學既至倡率標的立章程以考衷樹風聲以彰教  
而賢者慕不肖者勸焉雖貴游子弟咸斤斤自敕不  
敢干以私嶺南人至今頌之乙亥遷爲右叅政撫循  
五嶺時新會盜起爲梗鎮巡委提督諸軍遂懸兵深  
入擣其巢穴取渠首而殲之脅從多所全安捷聞陞  
俸一級賞賚有差辛巳轉右布政嘗視篆直指使者  
檄弊庶僚則按其可弊者施行之所否則格不報迨  
左轄江公朝至私語其子曰章公此舉人所難也嘉  
靖二年陞廣西左布政使至日檢舊例務省約裕民

朝廷爲戚里陳萬年建甲第會派省藩羨餘一萬兩  
拯以廣西地瘠民貧素無積財難以刮之惟軍門有  
犒賞餘銀乞將協濟以甦民困巡撫張公嶺從之不  
煩括索而上下恬然時論韙之陞都察院右副都御  
史撫治鄖陽嚴武備興學校三年改蒞濟寧理河道  
適當河變二三喜事之臣欲別開新河拯以河性靡  
常悍猛難制豐沛之淤塞因黃河之傍衝黃河之傍  
衝因上流之未濬宜卽疏支河以殺其勢築長隄以  
防其衝然後挑通漕沛自無淤塞之患不過費十萬  
緡自可成功且黃河爲患已非一日智者不與水爭

地惟順其勢而導之而其激盪變遷雖神禹不能使  
九河常如故也後世或塞其決或隄其卑或疏其派  
皆隨時救患者也弘治初河決荊隆口又決黃陵岡  
又決張秋當時嘗濬孫家渡趙皮寨等處而後荊隆  
黃陵張秋等口可塞亦分洩河怒之驗也况自河南  
歷直隸至山東之曹縣時長堤以禦河患亦既有年  
爲今之計惟於豐沛一帶爲堤以禦之不使淤漕渠  
耳烏可輕費朝廷之錢糧絕閭閻之地脉變丘陵以  
爲下舍川澤以爲高哉若曰神河叵測固非力所及  
必欲求別遠圖以蹤陳宋之蹟則新河一關非棄百

數十里之田爲巨浸不可以爲河也朝議不協以姑蘇盛公應期代之竟不底績及竹澗潘公希曾用拯議而工始集當河變之時漕渠阻塞南望一路運船盡膠於沙上下洶洶拯食不下咽寢不安席露曝禱於泰山寧陽泉水忽涌數尺膠舟盡釋繼以天雨河漕獲達六年盛公代會營造 顯陵命以少司空提督其事廷議計費六十二萬有奇方究厥工比至輒殫心研慮僅用銀二十六萬而大工煥然落成拯素諳堪輿家乃下流築壩以固堂氣濬明堂以開勝築培堙埤龍岡委迤以護佳城事竣朝廷錫以白金文



綺明倫大典以彰厥勞已亥秋 聖駕南巡登純德  
山徘徊稱善者久之諸臣以拯名對 上曰拯以某  
事去意甚惜之郢中疫甚昕夕殫慮賑救饑疲民賴  
以全活者甚衆八年陞南京工部尚書尋改北京工  
部尚書授資善大夫命侍經筵大祀勅省牲分獻瀆  
岳籍田賜扶犁錦帶蠶室成賜寶鏹千緡拯代南坦  
劉公麟或言劉政不便當更之拯曰劉公節慎帑藏  
釐革宿弊井然有經吾當守而弗失者也柰何變乎  
大學士桂萼一日延六卿議事出海運一疏商之衆  
莫能難拯曰海運北河漕固易但有風濤沒溺之患

且天津等處近年海口淤塞自古未聞有濬海者桂  
遂止庚寅夏言建議分郊 上命九卿議之拯以是  
事關本部將順則立蒙眷寵然 祖宗百五十年於  
茲一旦更之勞民傷財無益於事矧五星聚營室將  
有土木之漸東南民力竭矣豈可疲民以希寵乃上  
疏極論其事 上大不懌然輿論籍籍趨拯讜言故  
上亦不能顯黜之又以請建仁壽宮不當 聖心而  
權貴用事者勢甚薰灼益忤 上意于是革職以冠  
帶閑住拯雖去而時論益重之庚子丙午言官起廢  
逸吏部兩疏名上請竟不果蓋拯孝弟忠信出於天

性與人樂易不設城府然於權貴紛華澹如也謝事  
丘園葛巾野服與野老盤旋雲水間懽呼酣飲若素  
無勢位者足跡未嘗入州縣家事一不經心於天文  
地理醫卜百氏之術靡不研精得其肯綮雖家居數  
十年而憂國之心彌篤每占天文先事多驗輒夕不  
樂戊申正月卒年七十

童俊

童俊字天英蘭谿縣人識達天人學窮理奧由舉人  
知嘉定時民事田獵不知耕稼俊教以力穡至今祀  
為稷神又知趙州出富民陸氏之冤獄識拔進士安

魁於賤隸因內臣王政巡歷踐踏士類不欲折腰遂致政歸民攀車泣留共立生祠祀之歸家饗餐不繼子徹其几以易米則持卷于手從容謂門人曰將以辦早厨耳處之怡然日夕考索經傳作書韻會通若干卷士論嘗評其家學精則童品博則童琥其兼之者俊也

### 潘希曾

潘希曾字仲魯金華縣人弘治壬戌登進士選翰林院庶吉士除兵科給事中武宗登極時閣豎初熾有故太監汪直義男汪玉乞陞錦衣衛鎮撫帶俸守

瑩者卽首疏奪之其略曰世祿以及子孫鬼神不欲  
非類內臣本無後而強求世祿之恩義男本異姓而  
欲冒他鬼之後疏上中官切齒恨之又上疏勸武  
廟隆大孝勤聖學節遊樂遠佞倖八事逆瑾遂決謀  
中傷正德丁卯差湖貴二省計處邊儲陞吏科右給  
事中時瑾虐焰方張凡差者必重賂以求免禍有司  
亦爲備千金希曾毅然却之曰我爲諫官未能除  
君側之惡我之罪也柰何復助之乎瑾諷曾多叅劾  
爲招賄地不從遂大怒矯命械繫詔獄拷訊百  
端欲寘之死逮杖闕下希曾暈未甦瑾快示其黨

曰此後生潘某也死矣左右負以出卽日除籍爲民  
時見瑾者雖公卿必屈卽被謫遣亦必辭以行獨不  
往旣還鄉里杜門不出日惟課子弟讀書居後傍水  
有佳竹蔭可息間招親友觴咏悠然自得因自號竹  
澗居士庚午瑾伏誅明年詔起刑科右給事中甲戌  
偕太史甘泉湛公若水奉 詔持節往使安南錫麟

袍玉帶以行尋陞禮科左給事中旣入其國先諭威  
德正禮儀然後致 命紀事觀風有南封錄復 命  
陞工科都給事會內官監奏請修大素殿天鵝房諸  
役費累鉅萬抗疏力爭之其略曰方今邊儲告匱冗

食日繁山東河南近經兵燹江西四川未復瘡痍况  
營建 清寧二宮大木采及於遠方工科派遍於天  
下若復別興土木誠恐民不堪命疏上不報然無益  
之費自是少息丙子擢南京太僕寺少卿先是滁和  
之民困於買馬爲奏更折色民大稱便而馬課視昔  
亦易完在滁凡六年不調 世廟御極乃擢本寺卿  
嘉靖癸未遷南京太常寺卿期月改北提督四夷館  
乙酉晉右副都御史提督南贛汀漳等處軍務 賜  
璽書斧鉞以行至則明號令修器械時簡教擇謀勇  
信賞罰以爲備先是壬癸之亂招撫新民衆多各巢

連和漸以猖獗爲民害希曾鑒昔日之弊務馭以誠  
信其有自相告訐者則聽之以離其黨先年有功未  
賞者有司或吝於出納悉令賞之於是惠州黠寇賴  
貴聚衆肆虐乃發兵進剿空其巢穴奏凱 上嘉悅  
賜金幣慰勞焉泐頭餘賊蝟興流劫江廣荼毒生靈  
乃發諸路兵夾剿賊大懼襲通判董鳴鳳以要我撫  
會曰此賊故智欲緩我師耳昔人墮其計中吾可復  
蹈覆轍乎乃下令曰通判自憤事不足恤然有能掖  
之出者悉宥之益督進兵戰數合賊大敗生擒渠魁  
餘黨奔竄通判卒獲全乃令以功贖罪犁庭俘馘罔



俾遺育乃籍其田業貧民審其脅從者分配內地全  
活甚衆已 召入爲工部侍郎迨論功竟弗及焉旣  
還朝時河水汎濫漕渠弗利任事者方興新河之役  
費且數十萬死者數千人人心皇皇歲運不繼旣受  
任誓殫慮畢力濟大事夙夜兢業考故詢謀遂決策  
上疏謂河流故道非一其大而要者若孫家渡趙皮  
寨乃上流之支河也沛縣飛雲橋乃下流之支河也  
弘治以前三支分流會於淮而入海故徐沛不受其  
害邇來上流二支俱就湮塞全河東下併歸飛雲橋  
一支下東徐呂二洪上遏閘河流水溢爲游波茫無

畔岸於是決隄壅沙大爲漕患探本之論固有在矣  
上嘉納焉旣至濟卽達觀徐沛險阻弗辭相度要機  
洞利害乃復上疏以爲濟沛間漕渠忽淤者蓋由決  
河西來橫衝并掣閘河之水東入昭陽湖故閘水不  
復南流而飛雲橋之水時復北漫故沙停而淤也今  
宜加築東隄以遏入湖之路更築西隄以防黃河之  
衝臣愚且拙不敢求新奇之功不敢爲苟且之計惟  
欲因舊以爲功從省以濟事故捨新河而修舊漕者  
圖其易也沿黃河爲隄百四十里者防其溢也停派  
夫十數萬僅用河夫二萬餘者恐民勞也罷催募而

行犒助者慮錢糧難繼也 上復納之不期年而功  
成沛漕通歲運如故己丑秋河溢境山西徙三百步  
亂石絕流雖虛舟不得上於是遠近駭愕舟戒弗行  
乃命穿故河廣十丈以通水稍截徙河逼之東仍於  
徙河兩涯下歸以漸相屬埽漸逼河流激盪因決入  
故河奔放衝滌一夕河廣一倍二三日盡復其舊御  
史傅炯疏其費用甚省功緒速成上有以紓 九重  
漕河之憂下有以遺一方民田之利 上乃加尚書  
俸級仍總理其任己丑冬陳疏乞骸不允辛卯春  
召改兵部右侍郎上任五日而部署災時堂屬多被

以一身任其責上承 清問下率羣僚內稽圖籍  
外籌邊計舉無遺策本兵宿蠹沿襲世胄憑怙乃釐  
革裁制盡復舊章是年秋陞本部左侍郎冬 勅督  
理 仁壽工役力疾趨事日不遑暇壬辰三月十九  
日傳制賜進士朝服侍班是日同省宴進士日昃始  
歸有頃不起年五十七訃聞贈兵部尚書性孝友質  
直簡靜惇愨平生言動未嘗少越法度接人冲夷和  
粹而不喜譖詐無尤無比無賢愚大小一見必稱曰  
長者有德於人未嘗自言人有不以禮自處者人弗  
能容獨亮之不見其非於事靡所不學而一無所炫

視之若愚及臨大事決大疑若燭照數計知止足而拙於進取爲太僕凡八年居卿貳且三考朝列莫有同者而介然無累其讀書精思力寬發爲文章雋腴古雅詩尤清婉所著有竹澗集若干卷

### 王坡

王坡字舜耕東陽縣人也弘治間授浮梁令初至戶有以例饋金者坡一無所受縣中白額虎嚙人甚衆有處子將嫁堂序森森環立虎直入啣處子去訟于坡坡竭誠焚牒于城隍忽虎夜入城衆因格殺之僉曰此尹感應所致也爭獻搏虎歌又值大旱素服

芒履自暴炎煇中三日大雨如注遠邇沾足民又爲  
甘霖頌以獻在任二年甚得民心因忤上官竟拂袖  
歸坡自幼精太素脉甚言禍福屢有奇驗

徐讚

徐讚字朝儀永康人也登弘治乙丑進士授知棗強  
縣劇賊劉六等流劫郡邑讚繕兵城守先事爲備賊  
聞獨不敢犯民饑捐俸募粟作糜食之富人義激爭  
先發廩所全活以萬計陞山西道監察御史理醴長  
蘆兼巡河道逆瑾餘黨楊虎等流劫開濟間熾甚讚  
以計擒之械送京師巡按江西勦河寇徐九齡等數

百人論功陞俸一級時宸濠久蓄異志讚結羣寇以  
自樹此舉實翦其羽翼也又累疏請寬逋負罷徵役  
釋寃平獄風采翼然陞知蘇州府抑奢麗剔蠹弊課  
才惠民百務必舉宸濠之變治兵給餉遣戰艦出江  
爲上流聲援濠遂挫于安慶不能直窺南都者讚與  
有力焉加陞河南左叅政仍掌府事在蘇凡七年其  
政大要以愛民爲本擢江西叅政陞貴州按察使尋  
改湖廣又調雲南陞本省右布政使尋轉左使以母  
夫人程年八十䟽乞終養歸家陞都察院右副都御  
史撫治鄖陽等處改撫河南值歲饑盜起條陳救荒

三事曰寬賦歛以安人心廣賑恤以救民命嚴備禦以弭強梁又陳便宜四事曰處歲派以資歲用均地糧以蘇民困移水次以便兌運處馬政以節民力事皆施行陞工部右侍郎丁母憂哀毀屬疾卒讚賦性寬和雅量海涵終身未嘗有怒容或擬之劉寬婁師德云

盧 煦

盧煦字子春正德戊辰進士任長垣令修濬城池選練丁壯以禦流賊垣邑賴安陞刑曹尋擢四川僉事芒部爭立川貴合兵攻之不克煦率衆往平之邊境



晏然陞湖廣叅議提督太和山具疏乞休甘泉湛若水稱其勇退全節云

李滄

李滄字一清永康人也登正德戊辰進士授南京工部營繕司主事嘗差督甃儀真及司龍江關抽分廉慎有爲人不敢干以私雖中官同事者亦嚴憚之公暇輒與崑山魏校永豐夏尚朴講學窮理以求檢身之方一切世務泊如也卒于官貨馬質物乃克歛鄉人高其風操率私錢爲樹坊以表之

應典

應典字天彝永康人也性沉篤刻志學問登正德甲戌進士授職方司主事與江山周文興論學有悟遂引疾歸與仙居應良黃岩黃綰過從講切又師餘姚王守仁授致良知之旨建書院于壽山集諸生講學四方會者常百餘人再起兵部車駕司主事念母病目無見復引疾歸養而母日忽明人以爲孝感朝紳多論薦不赴自釋褐至啓手足名在仕籍三十年前後兩任僅一考而已

張大輪

張大輪字用載東陽縣人也少師事楓山章先生舉

正德甲戌進士授工部主事三載報政忽夢父疾心  
戚乞歸抵家父果不起人以爲孝感起服補刑部主  
事轉郎中訊囚得活者數百人擢建寧知府有酗酒  
殺兄者賄有司久不決大輪至竟置之法時旱久卽  
雨古田寇作當道難其計大輪獨馳檄曉以禍福尋  
散不煩寸兵尤溪二大姓構訟踰三十年結營闔死  
者百餘人大輪承委單騎詣解輒伏罪更知常州擢  
福建按察副使遷江西叅政咸著靖亂之略以母憂  
去卒于家

陸震

陸震字汝享蘭溪縣人也從楓山先生學慷慨有大志以名節自砥礪舉正德戊辰進士授泰和令威德益著賑恤民艱邑遂稱治民戴之如父母立生祠祀之被召授兵部武庫司主事遷車駕司員外郎時江彬怙權伺轡車駕多巡幸震抗陳仁義之疏幾獲重譴以大臣申救得免已卯春彬復誑上南巡命下中外洵洵懼變莫測震曰事急矣旣不能去又不能言吾何以祿爲遂與同官黃公鞏疏陳六事請斬江彬以謝天下彬銜之矯詔下錦衣獄逮擊月餘拳梏跪于庭五日三訊三杖而死時霾霧四塞晝晦

如夜水溢内海子玉河七鐵柱齊折如斬僉曰此乃  
 天意示變也初震在獄時瘡病方劇慷慨賦詩有惟  
 有梅花入夢香等句又與黃公鞏講易九卦以明處  
 憂患之道其從容就義如此 世宗卽位首詔贈太  
 常寺少卿遣使 諭祭廕其子有司爲立專祠祀之  
 名曰褒忠萬曆四年並祀本府三忠祠體仁震季子  
 也震係獄權奸必欲寘之死絕其食飲體仁甫髫年  
 乃變服爲他囚親屬饋于父歷荼苦萬狀母恭人徐  
 以是強令承蔭選通政司知事歷臨江節推章州通  
 判莅官廉介有循政無忝先德云

唐龍

唐龍字虞佐別號漁石蘭谿人太夫人方寢夢獅踞  
門而向日驚寤而龍生日光正射蓍也幼卽岐疑有  
奇志而機神警朗讀書過目卽融領從鄭進士聽菴  
公受易弱冠遊楓山章文懿公門正德戊辰進士授  
郟城令郟荒敝甚民戶流亾至則煦嫗愛養紓恤勞  
來之身勤約以率僚吏歲旱則徒跣請禱甘澍隨應  
於是百穀豐成流民相繼復業戶口稍益繁焉屬流  
賊起燕齊殘破州邑無算郟當賊衝乃崇城浚濠治  
戰具選城中壯子弟并招鹽徒且乞兵督府爲備禦

計未幾賊至攻城不利則板營奔馬頭寨因勒兵追襲之斬獲二百餘級數日賊步騎二萬來報馬頭之役又乘其未定縱壯士奮擊之復斬首百餘賊怒因糾合各部黨號三萬直趨郟勢甚熾乃製椀口長柄等炮賊至炮發連斃其驍銳六十餘人賊大創以去旣騰檄當道連帥喜卽布郟檄諸州俾觀法郟城令焉後竟以軍功陞俸二級龍初蒞郟視縣倉餘小麥數斛庫惟有銀三兩深以爲憂曰卽緩急何賴於是節省措置其後積粟麥至二萬八千石銀亦至三千餘兩其破賊城守抑恃儲蓄爲固云三年威惠流鬯

士民孚悅訟獄益平以父篁嶼公憂去服除擢監察御史出按雲南時武廟數出狩奸孽實導之上疏乞戒巡遊以安夷夏因斥江彬等罪請寘於法以爲不臣之戒土弁鳳朝明以罪廢厚賂寵臣錢寧寧諷鎮巡諸官洗雪規復用又首駁正之寧乃矯旨俾襲部檄下又執奏於朝遂褫其職指揮盧和寧假父也殺人罪死寧囑獄官濫出之且致書於龍手裂其書竟致和於理凡再忤寧衆皆危之不爲動巡撫中丞以滇戍卒多冒補非世胄者將覆汰之其帥臣因稽其月給以激衆衆洶洶且爲變乃語中丞曰滇



夷方也以夷治之乃安今宜無追呼而尺籍悉備撫而肆之猶逾募配矣獨柰何欲擾之中丞以屬龍乃諭使給糧俾復其所而後衆定其他所建白皆懸契時宜滇人賴焉庚辰按江西承逆濠之亂百度蕩弛初發難時 朝廷命二璫暨都督許泰劉達帥禁兵討焉比至而濠平久矣然猶恃威福凌虐吏士軍校皆占民舍以居剽黷淫恣乃甚於寇民不勝毒乃首收縛其邏卒且榜於市亟疏乞班師而促泰等行民始卽安時屬官功罪尚疑未白諸從逆者請託規避猶視事如故龍召而數之曰臣子事君有死無二夫

曾從罔治謂凡民爾若等讀書受官食祿旣不能固  
封守又不能明節義乃爭先附降奉頭苟活尚得偃  
然居位爲權貴販卒耶卽日收其印綬而列其不忠  
之罪於 朝與褒節旌功之疏並行焉鎮守內臣崔  
和前在金騰大逞於民爲龍所劾治及再與從事貪  
暴益甚禁之如初和恨浹骨後和居中用事每伺求  
其短欲以危禍中之卒無所得師旅之後凶年薦臻  
龍極意民隱撫戢賑濟若痛在膚恤災數疏讀之令  
人垂涕議者以謂江西撫綏之功不在王新建下徐  
御史岱陳中丞洪謨交奏其功請亟超擢辛巳拜陝

西按察副使提督學校其教以敦行誼正習尚變氣質崇節介厲廉恥爲先時士學趨詭異乃新正學書院分經建局選士羣肄之剗其奇靡而約諸理秦士興焉尤敏於精鑿品士校文錙銖不爽拔秀彥於髫年蒐茂異於寒畯凡所賞錄其後往往登進列爲名臣矣初元山席公書嘗令鄉多善政龍時召故老咨而行之元山服其義遂相知重至是元山位宗伯方與宰衡異同龍因鄉試發策論朋黨陳列大義以諷元山閱錄曰是策專箴大僚非唐提學不能作亟呼秦吏語曰爲我謝唐君謹受教矣其爲朝望所重如

此巡撫中丞監察御史累章論薦 朝議徵列卿不  
果嘉靖丙戌進山西按察使風裁峻整事至迎解一  
道肅清驛置中徒犯數十百人歲無所得食因夜噪  
而遁有司議加越獄罪龍曰此迫於饑寒計乃無聊  
耳且胥靡豈狴犴囚比耶乃簿笞其倡首者數人而  
議責其顧直爲緩期俾自持謀投所由郡縣輸直皆  
縱遣之衆泣謝去相謂曰公實活我願鬻身以母負  
卒無有沉其脾者不越歲而輸悉至其誠信感人如  
此丁亥入爲太僕卿七年擢爲左僉都御史總江淮  
漕兼撫廬鳳諸郡兩淮續年災異田土蕪曠民困甚

而長吏多賄政不恤民乃首頌吏誠以儆有位於是  
貪墨吏望風自解去又乃撫民利病之大者以次奏  
請興罷之漕政久而弊滋隨宜修治其所規畫皆爲  
國經遠計淮當天下舟車之衝驛傳積蠹瀕河州縣  
役夫疲於奔命乃爲剔剔伏垢立簿要勾稽之而奏  
省進奉快船及入貢夷使馳驛者供索並從縮民以  
少紓江北之民苦養官馬積逋至千餘匹吏急之不  
能得又有備用馬入之太僕土產不勝任則別市以  
償率一馬而費百金民弗能堪上奏乞暫停官馬而  
輸太僕者令折徵省費十五壽州正陽關榷商通秦

二州有無田子粒本皆一時權計而卒爲暴濫漕卒  
勞甚而又有船料之徵並奏罷免之徐沛新河之役  
調河南山東丁夫五萬餘供餽取給二百里外加以  
參蒸病者相枕籍 廷議下之龍曰疏濬舊河而增  
築其堤自可通漕較之新工難易百倍卒如其議民  
不大勞而河迄通利承命慮囚平反者數十人釋輕  
罪二千六百有奇開府二年吏士懷服兵農感悅商  
工通惠威化大行己丑召爲副都御史北行日淮人  
老稚啼泣遮留至繪像生祝之建祠者相望焉其得  
民如此在內臺正色立朝百僚肅然憚其風采擢吏

部右侍郎十年轉左署皆攝太宰事於時內閣權甚  
 重進退百官銓部皆取風指龍抗行已志介直不阿  
 朝臣有坐論執政屏斥者數十人悉收用之無所避  
 開國元勳劉基常遇春李文忠鄧愈湯和後皆失爵  
 百餘年累經 廷議弗能復乃稽據故典奏復之五  
 臣子孫並得續封每授大吏必先器識而後才華進  
 廉靜而抑奔競其小官則以資品叙之人稱公允會  
 關內久饑民相食 朝命發內帑銀三十萬賑之而  
 胡酋吉囊擁衆十五萬人據河壩時俺答衆號四十  
 萬亦出沒邊徼全陝戒嚴在 廷會議推才望素著

者昇以安攘之寄俄有 特旨陞兵部尚書兼右都御史總制三邊軍務兼管賑濟事宜及受命入關躬歷村落宣布 上恩區列機宜訓平糶蠲官逋寬私債節用度停勾攝撫逃移恤老羸收遺棄散糜粥給醫藥凡十餘事奏報 上大悅有忠勤體國之褒十一年秦又饑復奏請發其賑法仍舊而所活有加時邊備久弛虜每歲一深入蔓延二千餘里恣其虜掠而去諸路僅保營壁莫敢誰何至則首簡戎行飭器械號令一新士氣皆奮而尤以選將領明賞罰爲先梁震王効劉文謀勇冠一時皆拔自麾下推誠任之



卒爲名將嘗謂諸鎮帥曰虜徂中國兵不出塞故敢  
陸梁夫先人有奪人之心此兵要也壬辰秋乃親秉  
鉞帥師三萬由暗門直指陰山軍容甚盛鞞鼓之聲  
震於荒落虜驚徙營六百里不敢輕窺塞上明年秋  
虜以精騎三千潰鎮遠關入簿平虜城乃督震効等  
分左右哨馳至柳門夾擊破之斬獲一百四十級虜  
亟浮河而遁捷聞降 勅犒勵有銀段之賜甲午春  
虜衆二萬分掠延綏時梁震赴大同故虜乘虛而入  
乃令撤震還至清水營會叅將任傑兵繞虜後合戰  
俘獲五十餘級其夏牒報虜三千餘潛營嚮水波羅

地又檄諸將分布要害嚴兵以俟虜果猝至張鳳梁  
震前擊之虜潰乘勝逐北俘獲七十餘級秋吉囊自  
將十萬騎入營花馬池乃令曰賊寇延綏張鳳主之  
寧夏則王効固原則劉文其折衝批亢則委之梁震  
部分已定虜從青沙峴犯延安會文率所部赴之設  
伏以要虜文自迎戰伏起乘之虜大敗斬獲百三十  
級于時王効敗虜於興武營梁震敗虜於乾溝二旬  
之間凡三捷焉兵部奏功曰始都御史王越襲擒虜  
首四百餘以功封威寧伯尚書王憲以三百餘級加  
太子太保廕一子世襲錦衣衛百戶今虜酋親擁大

衆志吞涼朔而唐龍連摧覆之較之往績事勢尤難而功績過焉古稱一月三捷今乃二旬厥功殊矣乞此二臣特加封廕用答忠勲竟爲執政忌者所抑賞多薄焉大同之亂與北虜連王師討之未克乃遣梁震帥兵往援且以計携虜楊言西師百萬擣其巢穴矣虜師繇此却顧而震因得以降其城執其首惡一方底寧其力居多在軍於三邊四鎮山川地形險阨歷歷如指諸掌爲圖置座隅卽寇至坐而籌之指授諸將方略咸中機要動必有功在邊四年戎夏慕其威信 朝廷倚重焉丙申改刑部尚書時執法大臣

相繼去位諸大疑獄宿留不敢決毅然任之外戚張  
延齡以罪逮繫奸人劉東山乘機上變構間兩宮其  
徒朋與爲奸利告訐蔓引株連遠近被逮無虛口法  
吏坐獄不窮竟去者數十人龍按得其妄狀竟抵東  
山於法都人快之異時議大禮大獄諸臣謫戍且十  
餘年業多物故前後論救者數十疏輔臣復從中申  
解不能得龍曰是難以口舌爭也顧明主獨可以  
孝感是歲九廟成詔下覃恩懇懇請赦諸臣  
上許之得放歸者二十八人武定侯郭勛權傾一時  
欲攬諸司之柄條陳若干事其四事下刑部諸司怵

勛勢燄議多依違獨叅駁其妄勛有請託輒嚴辭拒之涿州豪李昭坐重辟賄諸權要前後上辯八十奏遭誅者二十餘年當朝審勛與執政皆勅使欲附比出之龍曰殺人者死必如律京尹劉淑相與當路大臣訐奏發其陰私當路必欲寘之死龍曰殺人以媚人吾不爲也淑相止坐落職由是多所忤貴戚大臣其年以尚書六年考加太子少保先是起家宦於郟於京師於晉於淮再入秦皆奉太夫人以居自秦召入也太夫人思鄉南歸諸弟因留之時太夫人年踰八旬雅懷歸志爲所居位多危嫌疑涉規避低回

久之至戊戌夏陳請乞休終養詞指酸切 上嘉其  
之優以給驛公卿祖送盈道皆歎其忠孝兩盡全節  
完名都下相傳以爲盛事既歸閉門却掃朝夕侍太  
夫人起居飲食必親進之養志承顏曲盡其孝暇則  
進門下諸生討論義理商略今古間以文藝自娛若  
將終身家食六年臺諫騰章論薦凡三十餘疏 上  
特旨起用甲辰秋推改南京刑部以地近便迎養故  
具辭未得 旨而進爲南京吏部尚書尋以北虜猖  
獗諸邊戒嚴 朝廷擬本兵非龍不可遂承 簡命  
仍勅兵部馳驛趣赴京奉太夫人北上且具疏辭不

允仍 勅兼管團營軍務以乙巳春至都總理樞密  
經略邊防未明振衣日中退食忘其勞瘁形爲之衰  
龍深識兵機以爲制敵之本惟在任將而故時驍勇  
總兵白爵李朝陽張鳳等皆坐廢中其以註  
誤閒廢者復數人其餘無可用者建議曰邇來諸  
邊解體正以二三用命宿將爲言宣昔舉細故而文  
吏復以法繩之摧落且盡繼之者惟怯自救不暇何  
以望其樹奇宣威哉夫跣躄之才負俗多累寧當以  
二卵棄千城一蹶廢千里也故曰使功不如使過乞  
宥諸將在繫者令其立功贖罪廢錮者從宜用之得

昔會如所請 朝論違之往年防秋率不能先事隄  
備虜去來若風雨乃於夏中即檄諸邊申嚴師律修  
城塹遠斥堠虜至則持滿待之至秋虜騎數萬軍於  
大同之北諸將出精銳逆之虜知有備遂引去自是  
邊境晏然大同叛軍亡入胡者歲誘虜入驅牛羊子  
女徜徉而北以爲常龍曰是類有所恃且生他變乃  
密下教宜大二鎮令謹備非常俄而大同王子克等  
八人齋稱臣奏文及符印旗牌等令二徼卒走虜潛  
約攻城爲內應者總兵周尚文覺其狀遣人躡之徼  
外三百里執以歸得所爲表印卽檻送八王子并其



黨數十人於京伏法其年八月加太子太保因乞恩  
得以今官貶封四代十一月轉吏部尚書龍故嘗爲  
少宰習其利弊郎吏亦雅信服之銓部常格循資序  
進自其後多越次超遷其淹蹇者或祿守一官而十  
年不調龍曰限資固賢愚同滯越格亦僥倖易生其  
失等職在銓衡均平爲允乃錄其年勞之尤深者數  
人進拔之以明資叙其有異能奇績自可不拘士論  
悅服歲貢生員當補教職者待次京師積二千餘人  
選部一歲六銓員不滿三百貧士久旅衣食弗給乃  
亟責所司吏檢究疏通之臺諫建白舉用廢才事下

龍曰人才故可惜矧爲人所媚而淪誤者乎乃數上  
四十人皆時望也雖不果行公議少伸矣故事推補  
除授皆太宰主之自左右侍郎皆不得與乃曰爵人  
於朝與衆共之故每舉必會僚屬叅詳裁酌有至更  
數書者而與少湖徐公宛洛韓公尤以德義相劘切  
有古同寅協恭之風會故大臣復起執政多所指摘  
因傷足移病乞告且謝宰事有 旨暫就私室調理  
部事仍署掌至五月病增再疏陳疾引年不允至六  
月疾益甚懇疏求去因昇疾辭 朝去都城二十里  
轉劇不可行則僦屋以居旬日竟薨於旅舍其日大

雷雨電光繞室移時乃定壽七十所著易經大旨若干卷漁石集若干卷雲南奏議江西奏議督府及總制奏議共若干卷傳於世

戚雄

戚雄字世英昂之子金華縣人也正德辛未進士令建陽約已愛民植良剪惡置學田以優士減支應以節財建人德之祀名宦祠既調南海剗煩尚簡擢南道御史巡江聞寧藩變起亟如儀真調兵要害爲防守計上下長江歷暑雨風濤無所顧恤迄逆賊就擒始解嚴又奏免差南京守備太監及條處河患疏運

道足邊餉等五事多見施行嘉靖六年疏劾李福達之兇焰郭勛之比黨時以風聞妄奏逮問落職氣節表著士論避之平居不妄談笑銳意文學易簣時手不釋卷所著有雪厓文集金華縣志鄙見日鈔發賢文軌等書行于世

姜綱

姜綱字幼章號方竹金華籍蘭谿人大理司務芳之子性剛方力持古道正德中由進士任南刑部主事讞議詳明當請除方遜志奴藉理高介夫冤訟以議大禮與時宰不合呂涇野官武選一日于稠衆中問

及同鄉能詩文者網不應呂前席復詢答曰德行本也詩文末也本之則無末如之何呂改容謝之轉工部營繕司郎中剔蠹斥奸爲吏卒所憾共誣構用官物下錦衣獄尋得辨釋落職家居淡薄自守不預外事亦不以營家爲念其自贊曰方不就此行不諧俗知我罪我方竹方竹所著有鳳林類稿經史等記若干卷

邵 幽

邵幽字宗周東陽縣人也正德甲戌進士授建陽知縣九載嚴正有能聲民咸德之擢監察御史出按廣

東以忤權貴謫官卒入建陽名宦祠

楊言

楊言字惟仁鄞人也正德庚辰進士授行人使于代  
代王故好學賓禮益隆乃進諸生爲說易翕然心折  
復命未幾而代亂王出奔復使于代而代安王乃歸  
國遷禮科給事時大禮起堅不附聰蕓之議抗疏三  
上言愈激直上震怒刑鞫于午門至折指慘矣而  
終不易詞謫判宿州已稍遷溧陽令蘇州同知累官  
至湖廣右叅議以歸家居角巾布袍崇尚約素諸子  
中有以豪侈相矜者必痛誡之曰吾死不願汝曹有

此行也年七十有五而卒溧陽湖廣皆祀于名宦

胡森

胡森字秀夫號九峰浦江人也辛巳進士授南京刑部主事歷員外郎吏部郎中陞太常寺少卿尋進鴻臚寺正卿襟宇開霽風度穆清志存經濟仕不負學嘉靖初年議大禮始與羅峰張公意合以父教命不可遂中止不敢附名歷官銓部甄拔人才居多既歸大臣有欲引之再出者竟不從惟徜徉九峰山水間有九峰文集傳于世

應璋

應璋字德夫永康人也宋少師孟明九世孫嘗學于楓山先生一見語以黃勉齋所云真實心地刻苦工夫璋佩服不懈先生稱其純篤焉後膺貢授徽學訓導補長樂再遷羅源教諭正己率人人皆樂從致仕年九十終學者稱爲東白先生所著有四書索微尚書要略等書

董 遵

董遵字道卿蘭溪縣人也受學楓山之門潛心理學專志力行江右胡東洲督學禮爲浙東奇士貢入禮部試居首選授江西南昌府學司訓正身率物十多



向風時蔡虛齋邵二泉相繼視學徵主白鹿洞書院  
 轉溧陽縣教諭陞知江浦縣立積散法為備荒計在  
 任一年百廢具舉因疏乞近地便養忤當道意調知  
 廣東感恩縣懇請得終養歸居家風雨不蔽擔石寡  
 儲而事親曲盡孝道所著有金華淵源錄及文集若  
 干卷從子輦篤志力行事父母及生母以孝養聞三  
 喪九年不御酒肉不入內寢雖衰絰已除而哀慕不  
 替縣令疏其事於朝以貢格異等授思南府推官思  
 南教諭以禮義訓化之水蘖之操六年如一  
 日人以一門二孝廉稱焉

凌 瀚

凌瀚字德容蘭溪縣人也性端方沉毅弱冠卽負大志不規規科舉之學早遊楓山之門得其標的言行必期信果步趨必由規矩閑居正襟坐雖甚暑不去巾襪對朋友自朝至夕無惰容尤嚴義利之辨嘉靖乙酉以易魁兩浙益肆力學問凡天文地理名物象數以至禮樂兵刑漕運水利之類靡不究心四方從遊者日衆各因其材教之旣謁選授泰寧教諭泰寧僻處山中士子多朴少文瀚日與諸生講明理學且立爲條約以正其趨貧不自給者則分俸資之九年

如一日士習爲之不變在任兩應聘典山東廣西試  
陞周府紀善堅不欲出從遊者強之就道至則剛直  
自持輔王以禮其所上崇德講學等啓辭嚴義正王  
甚敬焉以疾卒於官所著有羣書類考太平策略邵  
武泰寧等誌金華正祠錄等書

金江

金江字孔殷溫雅聰慧承家學日以著述爲事嘉靖  
初由太學生任太倉州判官以開濬下浦有功陞高  
唐州同知捐俸賑荒民賴全活兩佐川治未嘗以吏  
事廢學所著有續綱目書法端本要略華州文滙錄

趙崇善

趙崇善字伯兼學者稱石梁先生系出宋清獻公後有諱某者爲蘭溪尉遂家焉崇善幼端重不妄言笑屹屹負巨人志十歲能屬文十七游膠庠輒有抗心希古之意丙寅丁外艱毀瘠骨立坐是幾廢公車業一日竦然曰舍顯揚曷以報吾親益感奮淬厲於學讀書獅山茆亭陋甚四無居隣雪夜有虎咆哮戶外勢甚獍而擁襪讀自如丙子登賢書丁丑成進士授婺源令下車謁廟諸生講時習章崇善曰某來樂與諸君學幸終始以君子相砥礪至人知與否某不敢

知得諸君爲知己足矣尋徧訪高行折節下之退食  
不入私室朝夕與衿紳談性學罪罪若吐芬屑曰此  
余治心術也嘗念善爲理者不欲擾獄市而何藉吾  
巧爲其居官不爲文深苛細朔望集紫陽書院與士  
大夫討論孔孟遺言已讀法爲士庶規已揖耆艾而  
問之某鄉俗何若某善惡若何某有訟而下之輿論  
何若就是時決事人人冷然濯以清風也鷺相在事  
議毀書院時福山紫陽在議中而有力者且據福山  
自占崇善復之爲石林精舍單車野服集諸生講授  
不輟每月兩課稅捐俸稍爲楮墨資舉婺歙二邑爭

絲絹之徭最久朝命索豪右急意有所指則毅然執對大吏不能屈而止郡將徐以嚴治屬吏奔走脇息崇善一奉職無所徇徐不悅久之乃大稱服曰幾失一賢者會行履畝法乃擇其敏而不欺者勞以卮酒曰毋相負事竣溢於額乃排其議均之上撫臺撫臺他委覆覈溢什一諸役悉就逮崇善爭之不能得迺列其狀于臺竟從之縱諸逮人而以他事論罷前委者稅契例解三千有奇餘以充他費時公私乏崇善獨寘簿請識其郡印主者收受上之郡邑不與焉或從吏使留此以濟匱則曰是掩耳盜鈴吾不爲也故

人有所請戒勿與通曰不欲以故人得辜百姓娶產  
研墨崇善再入覲無所攜人有遺之絹帽者匿金冠  
其中卽斥之出除夕有客相過市內及進客怪婺無  
交際乎崇善曰此邑之士大夫能自強也時人以其  
衙齋方之僧舍蓋不愧清獻公之篋云月治行異等  
召戒行而早走羣望徧禱出粟分賑得雨而後發老  
稚前擁而號至車枳不得行久之士民謳吟不已肖  
像生祀有嫠婦脫簪珥來助曰吾夫以里役破家迨  
兒事公費不半菽而役竣恨不剌骨以報也歲例清  
戎無益而費巨檄下崇善袖歸私署不以示六曹其

并遂絕于兩造平心決讞吏皆洗手奉法若夫催科  
絕借支徵解絕那移冊籍絕飛灑種種具在口碑請  
闕授四川道御史請告再除山東道上疏明公論正  
大典伸積寃語多忤執政而不之顧也出按遼左有  
暫免邊地行刑及勘議功罪考選軍政改文武職銜  
諸疏乙酉再請告丁亥丁內艱結茆墓側若無意于  
世者禫除姻黨爲勸駕庚寅北上會文懿公首揆席  
法當避改尚寶司丞奉 命冊封益淮兩藩晉少卿  
抗疏亟臨御圖治安及用人馭兵之要癸巳奉 命  
冊封楚藩再晉卿疏冊儲備荒及銷鑿致和之道已



上備邊要議是時言人人殊崇善堅主守指畫明析  
朝鮮六疏言其議可用太宰孫公器之薦太常少卿  
提督四夷館益思有以稱塞迺上稽古親賢疏反覆  
殆千言不報再請告家食者六年益委心性命之學  
居常不異寒素家人數以匱告不應齋中止一研鬻  
之以給庚子再起癸卯奉 命冊封益藩甲辰復命  
凡三銜 命艫鞅錯於道而其清節所在頌之矣已  
奉 命考譯字生眡其稅爲殿最請謁一切謝絕崇  
善體素癯亡何疾且革友人來視疾猶與之論學不  
輟一夕自診曰六脉已絕無煩醫矣頃之正容而逝

無一語及他第謂其子曰吾受國恩未報惟爾曹力  
學繼先志諸縉紳會哭於邸檢橐中裝才十數金爲  
釀金以贖始克襄事崇善負時望旦夕且柄用徒以  
親嫌多自引屏跡田里人以是高之逡巡謝弗居也  
氣度恬夷卽與褊心者遇無不愧解去日啖菜羹脫  
粟飯一盂無玩好無媵侍一室中惟圖書茶竈蒲團  
香几而已入官歷年於祖遺田六十畝無少益同志  
過從一肉卮酒共談客去掩關宴坐凝塵滿席湛如  
也居恒無一函入政府一字入公庭以爲常已丑歲  
侵衆嗷嗷待哺有謀居間者篋銀器數事至則正色

麾之一時知交肅然而至急人之急則踰於己永康  
楊某鬻妻償宿逋且請爲役崇善憐而解橐裝贖其  
妻令携歸不責其券事母志物兼備晨昏定省終其  
身在婺六載田租悉歸之弟且歲割俸與之撫其子  
如已出也性不好上人而言笑取予毫不以假雖卑  
幼見之必肅衣冠朔望謁祖廟畢必率子弟詣尊長  
致敬而退非祭饗不殺牲雖肖翹之物不忍傷焉間  
涉內典曰取其空寂澹泊與吾儒合蓋以證此心耳  
卒之日年六十有三

虞守愚

虞守愚字維明義烏人也由進士初宰嘉魚調萬安  
懷民以惠擢御史上言時政忤 旨杖幾死按福建  
及徽寧等處人謂其知治體嚴重不可犯又不專于  
惠也轉大理寺丞尋陞都御史提督南贛汀漳軍務  
所轄吏悉鑒其才鄙勇怯而兼容之是以鼓舞衆職  
吏無不稱最爲歐陽南野所推重歷大理寺卿以南  
京刑部侍郎謝政歸平生淳篤孝謹立朝居鄉並以  
厚德見稱所著有經書一得錄虔臺拙藁東厓文集

楊祐

楊祐字汝承蘭溪人生十九當嘉靖元年領浙江鄉

貢入京師道鄒魯之墟過稷下周遊渤海之間登郭隗之臺慷慨悲懷有襟帶千古之意已而罷歸治一室河壩散列羣籍流覽其中而專覃思於經術於是學益深博八年登進士第試月初生賦天育驃騎歌改翰林庶吉士明年除知興國州考薦輒最入爲刑部員外郎遇謗出知濮州稍遷濟南府同知十八年擢江西按察司僉事復以謗待次家居歲餘調補湖廣按察司僉事二十二年暴疾卒于官年四十先是江西巡撫今司徒王公薦其文行卓偉宜令董學官當有以風厲人士其後湖廣部使者又薦其器用堪

以備兵皆先後報聞竟卒士大夫交相弔曰嗟乎楊  
子在何不可爲者今已矣初弘治間海內淳耀縉紳  
先生翕然興於學厭時俗頽齷踔厲振迅務追先秦  
西京而絀唐宋當是時北地李獻吉尚型范而信陽  
何仲默貴竒眇號稱復古天下嚮風焉祐先後崛起  
雄視中土初偕計詣公車吳君維新嘗以爲賈生明  
國體而匡衡推經術紹嘉哲軌在楊生祐亦獨喜自  
負爲文章奔放凌轢若馳車九折之坂而河決金堤  
莫之禦也其議論雄辯勇決颺起泉涌卒然聞之駭  
汗愕視至吏治之才本於天植他人縮衄已獨奮前

鏘發穎脫旁睨不見曹伍然終以此見忌疾羣擠偶  
培蹶益騰距豈非琦瑋卓詭不羣之士哉在兩州皆  
有惠愛民思而碑之其在荆楚尤得士民心旣卒卽  
爲祠以祀所著有端居興國西曹鄆城濟南江西湖  
上荆南諸集

章 适

章适字景南蘭溪縣人也少孤事大父母曲盡愛敬  
比冠携其弟述邁師名儒凌瀚步趨不違沉潛禮義  
淳如也嘉靖中舉進士授行人宣布 上命所至行  
李蕭然復命擢禮科給事中時 世宗未有倦勤意

無敢言及儲君者乃慨然曰事有大於此者乎爰進  
講讀疏雖忤上旨而風節凜然殆人所難未幾引  
疾告歸竟不起家無羨儲淒然一布衣也所著有道  
峰集若干卷

馮亮

馮亮字執夫號貞齋其先世自山東徙居義烏嘉靖  
辛卯舉於鄉壬辰舉進士令濶之丹徙邑瀕江南北  
最爲要劇民疲於供億亮以身任怨汰其十七吳中  
諸郡邑素苦白糧解役會歲大侵而役不蠲力請於  
部使者以贖鍰代輸故鄰郡流徙載道而濶安堵如



昔最聞擢兵科給事中俄轉禮工左右復陞兵科都  
給事中疏請清軍理餉建城堡治濠塹以備虜數事  
皆鑿鑿可施用中貴人某成國公希忠寵焰煽都城  
前後疏其不法皆得請權貴斂跡尋陞河南叅政會  
歲復大侵至人相食極意賑恤捐祿爲郡邑倡所全  
活無算是歲入計以治行異等賜文綺錫宴南宮尋  
擢四川按察使按諸貪墨吏無所假貸望風解綬去  
者數人尤加意獄事日夕手爰書讞牘至達曙亾寢  
遂以此得瘵疾再請始得歸且詔銓部俟病愈起  
而行至夔州歿矣僅四十有四耳素不問家人

已特廉河南入計時吏白羨金萬餘叱去之曰安有  
行苞苴馮公者歿之日夔守爲檢其橐中裝僅餘羨  
俸數十金而已其廉益著云

### 程文德

程文德字舜敷別號松溪永康人父十峰公銓弘治  
己未進士官至四川副使文德端穎有異質五歲能  
日誦數千言稍長博極羣書大司馬潘竹澗公奇之  
妻以女十五補邑弟子員從楓山先生遊授以誠篤  
自治之學慨然志於聖賢正德己卯領鄉薦上春官  
不第益憤發於學從陽明先生遊授良知訣反求於

心性嘉靖己丑進士第二授翰林院編修上郊祀議  
選庶吉士疏靈雪頌靈鵲詩親蠶行內訓講章孝敬  
勤儉四詩 上宴近臣於無逸殿得與上無逸講章  
奉 勅纂修祀典會同年四川楊公名上疏觸 上  
怒下 詔獄責主使者乃述所聞繫獄故事密投楊  
公爲守者所持上聞 上下錦衣衛急捕御史陳九  
德文德聞之毅然就繫而出九德比拷掠無一語黜  
爲信宜典史總督陶公諧延主蒼梧書院檄兩廣士  
從講理學盖倬然以斯文自任其教專主立志謂聖  
人必可學開示切要之語多士向風十四年改安福

令立鄉約均里役治豪右之不輯者建復古書院以聚諸生十五年丙寅陞南京兵部職方主事轉禮部精膳司郎中丁外艱二十年辛丑起復補兵部車駕郎中時北虜猖獗上備邊禦虜數事及造戰車法多見采行二十三年陞廣東按察副使未行轉南京國子祭酒與六館士約敦本實抑浮靡又爲葺號舍與射圃疏復館職以學行擢都御史二十六年丁內艱二十九年庚戌擢禮部右侍郎會虜騎薄都城分督宣武門嚴詰察盡入郊民之奔命者疏卹凋殘慎擒捕舒民兵三事三十一年壬子轉吏部左侍郎癸丑

當大計專評隲賢不肖以裨銓政會試知貢舉事竣  
加兼翰林院學士掌詹事府事教庶吉士兩直隸河  
南山東饑疏聽民輸粟散賑四省稱便 上禱祀西  
苑命侍臣撰釐詞爭綴奇巧以進獨寓諷意三十四  
年會推南京吏部尚書上疏力辭因勸 上享安靜  
和平之福 上大怒以爲謗訕有 旨褫職歸築室  
壽山角巾布袍聚徒講學杜足不入城市三十八年  
十一月以疾卒年六十有三性孝友事二親盡志善  
處其伯兄與人不設城府非禮亦不報恒居已於人  
之後生平樂道人之善而諱其過取子嚴雖一介不

苟清苦若寒士產業守舊僅自給卒不能葬總督胡公賻之乃舉隆慶萬曆間以臺省撫按先後請贈禮部尚書 賜葬祭謚文恭

### 趙祖元

趙祖元字宗仁號南巷婺之東陽人奇穎自負周覽六籍及諸子百家言尤精經生業每試輒屈其邑諸生唯邑諸生亦靡不人人心遜也遂以嘉靖癸卯舉於鄉明年成進士而雅志厭薄吏事疏請得教授江西之吉安吉安故稱人士淵藪而是時羅太史洪先鄒祭酒守益皆以講學家居率郡諸生日就請益無

不灑然自奮者居久之遷國子助教又二年遷刑部  
主事尋轉員外郎以執法格用事貴臣得仇直聲又  
二年出僉山西按察司事丙辰地震河東蒲州境覆  
壓過半盜乘之蝟起抄劫晝行密設方略解散黨與  
而悉籍其金錢之無主者數十萬官貯之且用新其  
城塹境以無事俄遷江西叅議治之如山西秩滿復  
遷山西兵備副使丁母吳宜人憂以歸先是族弟大  
史祖鵬女歸太保陸炳炳以貴倖帥緹騎勢甚張自  
相嵩以下咸目攝之故炳死而太史斥及其季刑部  
員外郎皆坐黨罷矣而論者亦遂以是併訾之夫嚴

陸方貴幸時諸蠅附士率躡數資被顯擢而祖元歷  
官二十餘年僅止副使尚可謂之黨援乎及歿而諸  
子蕭然食貧至貿資稱貸以償所遺子錢心跡始暴  
白于天下

### 吳百朋

吳百朋字惟錫號堯山青田人徙居義烏嘉靖丁未  
進士授永豐令爲政務先教化束矢入片言折服有  
水清鑑明之謠徵拜御史持節按淮揚卒遇倭亂披  
甲嬰城籌兵食晝戰守賊不敢逼先是倭薄東門外  
撫臣下令軍中開門者斬民襁負號呼者聲徹野百



朋曰郭外非吾民也耶亟內之母以與虜每按部以  
惠文彈治諸不法然持議平不苛其按楚亦然九載  
考績晉大理丞轉右少卿尋陞右僉都御史撫治郎  
陽改提督南贛軍務當是時內迫山寇外苦島夷羽  
檄旁午與兩廣都御史合兵四擊捕首虜無算已又  
敗倭于烏石又戰泔水神山賊兵燿已又敗倭于海  
豐捷聞賜金帛初賊首楊一戕殺長吏勢張甚而蘇  
阿普等依山阻險流毒四部乃懸賞格陽爲招拊而  
陰督大軍張左右翼擊之遂平洪田再破香寮又移  
師擊藍松程鄉擒其首渠轉戰大田別攻乳源始興

賊殪之先後破巢一百二十斬首數萬級鹵獲人畜  
鎧仗無算又移鎮信豐授叅將蔡汝蘭方略率師討  
平苦竹岑岡高沙諸賊餘黨盡平居民始得帖席居  
虔六年蒙矢石馳驅烟瘴間年未艾髮垂垂白矣前  
後奏捷疏十有八廕子一賜金帛十二加二品俸者  
一晉秩三隆慶戊辰擢南京兵部右侍郎再晉刑部  
右侍郎丁父憂起補兵部久之陞刑部尚書時部事  
久虛積案填委至則亭法讞疑獄無小大必躬親之  
以疾卒于官諭祭葬如例

張元諭

張元諭字伯啓浦江人也博通經史尤精于春秋嘉靖丁未登進士第授工部虞衡司主事持正不阿廉介自勵奉命董修內厰內官覲多估工料諭直拒之從公估報工完美餘悉歸于上時有誣以他事聞于銓司者銓長張華陽面詰有諸諭荅曰有之竟去其官爾亦不必問也華陽服其高雅誣者喙息尋轉本司郎中以忤權要左遷常州通判丁父憂歷守吉安桂林永昌三郡清白不渝咸著政績擢雲南憲副奉表北上以疾卒于途居家之日家積餘租悉以周族之貧乏及不能娶者羅念菴鄒東廓甚禮重之所著

有詹詹集蓬底浮談等書行于世

吳廉

吳廉字介夫歸安人嘉靖壬午以貢上春官甲申入業成均未幾會同舍生犯嬉走邏不獲獲廉謾譴之廉不深辨因乞歸久之聞湛公甘泉司成均復入業甘泉見而異之雅敬愛焉戊戌授知卽墨縣蒞官約已黜情專意愛民節用縣故有供欸悉斥廢頽解隻僕窶窶竢立揭書座屏上與其樂于身孰若無憂于其心與其益于家孰若無損于其民其子往省之謂曰吾有牧任當勞民勸相不爲私營汝母顧我爲也

子以故不滯行謹唯如命值歲饑經理勤勤亟亟爲  
民請賑適移膠河之役主者銳甚不能回廉切恫民  
瘼稽不發主者持之嚴曰吳知縣頭可舍官特餘事  
耳 朝廷命我牧民可視其就死地乎又逋負停積  
一時徵計使輜相繹下益苦之格不與其使構激語  
謂以木偶人因爲詩以自嘆曰老大粗更事疑非木  
偶人不應方寸地時展一分春祗自懷甘苦憑誰質  
質真歸田何日擬斗粟未全貧遂飄然棄官歸邑士  
民留者載道攀泣擗膺樹屨脫舄累帙以贈轉相賡  
和聞者興悲廉秉誠馭下與民如家人禱雨雨至驅

蟪蛄息侍御藍北泉境之賢傑嘗擬爲古之循吏今  
之純儒也比歸寥索故址率履益恣稽文述古或酬  
事據興下筆洵湧老而彌劼與壯髦相頽頽甲辰湖  
郡公創社峴山奉杖屨以往有司隆飲鄉校裒然虛  
左然多避不赴卒之日豫訣期訂果正裾坐口占一  
絕云草莽荆榛不磔行山前山後路皆平牧童短笛  
橫牛背自在還家月正明乃瞑年七十有九所著有  
醕中醒語及詩文若干帙藏于家

周 煥

周煥字克光浦江人也資性穎悟博學能文章居家

以孝友稱嘉靖戊午由貢授福建永福知縣居官兩  
月倭寇猖獗攻陷郡邑城池所至風靡燠率民兵晝  
夜督戰斬獲百餘級賊退憤甚益發兵併寇燠勵志堅  
守月餘力竭糧盡外援不至猶守城不戰死之時一  
家死者八人福民白于上官立祠祀扁其額曰忠  
勇文移本縣爲申司府允議列祀鄉賢

李 珙

李珙字侯璧永康人也由歲貢授東鄉訓導陞淑浦  
教諭嘉靖乙丑詔拔異才以風郡吏當道薦珙擢大  
理評事珙蚤有志理學徒步見陽明先生于越先生

授以致良知之訣珙悟獨居精思盡得其旨于是同  
門錢緒山王龍溪輩推重之在東鄉當道聘主豫章  
書院教事及淑浦日與同志訂會所至發明師訓聽  
從者衆平居不事生業死之日惟曰只此見在良知  
吾今緊密受用性命皆了古所謂得正而斃者珙之  
謂歟所著有質疑稿若干卷

### 徐用光

徐用光字成孚蘭溪縣人也性敏志潔不屑俗流嘉  
靖間由進士任工部都水司主事歷員外郎管臨清  
磚廠出納工料銀數十萬絕無緇涅中貴往來河道



有肆橫者每斥之不可干以私人服其廉能事竣陞  
屯田司郎中卒于官

胡節

胡節字孟通浦江人也由順天鄉試舉人授淮安知  
縣爲一時廉能首稱值外艱歸行李蕭然邑人感泣  
欲贖金不能強乃建却金亭于西禪驛之渡口自恨  
勿克終養廬墓而卒

龔曇

龔曇字汝霖義烏人也性至孝年十七因父演病躬  
侍湯藥衣不解帶比卒哀毀殯葬如禮事母尤謹凡

四十年母卒廬墓苦塊餽粥奠獻悲號三年如一日  
有司以孝聞詔旌表其門賜八品官復其家見配享  
永慕廟

戴 开

戴开字善甫種德尚義嘗捐已田五百畝置義庄以  
給養字族親姻之貧乏者又設義塾以教訓其子弟  
嘗時殿講御史盧公虔爲撰記子孫食報者至今不  
衰

朱 助

朱助字士貞浦江人也天性孝友母卒廬墓孝感三

異家燬回祿而師菜堂扁出煨燼若新一也盆栢茶  
枝致黃鳥卵育馴而不驚二也家有母犬病瘡其兒  
啣食食之三也兄士安謫戍麻陽歲具衣錢供給每  
出粟貸貧不收其息里中有甲當償乙者輒代償之  
其他善行亦多

### 潘 琢

潘琢字時循蘭溪縣人也性孝友不私妻子父喪毀  
瘠骨立酒肉不入口者三年母患瘋癩琢衣不解帶  
痒疴痛楚隨意搔摩梳洗水火皆親理之母久卧思  
起乃制軟輿與弟舁之惟其所適如此者七年母沒

哀痛幾死既葬廬墓九年人皆稱其克盡子道云有  
司延爲鄉飲大賓扁其門曰孝行

唐熊

唐熊布衣士蘭溪縣人也性澹泊躬修孝友母鄭夫  
人年老失明起居必敬扶持之不離左右伯兄漁石  
公以刑部尚書養親歸熊恭謹承意代勞母氏安其  
養焉家貧幾不自給而處之裕如雖兄陟上卿益自  
勵所守終其身不殖家產盖無於陵之避而有仲子  
之風者矣

黃棠

黃裳字元佐浦江人也篤行敦義嘗讀范仲淹義田  
記感而捐常稔田二百畝儲租以濟疎族隣里之急  
者名之曰希范晚第進士調三衢司戶郡守朱士麟  
稱爲儒林楷範

朱勝

朱勝字仲高浦江人也由舉人授刑部主事累陞郎  
中知武昌府未幾調蘇州府所至多善政蘇人歌頌  
德政十年流傳中外奉勅褒嘉超陞江西左布政  
使卒于官

胡榮

榮字希華浦江人居家孝友名動鄉閭蒐獵百家  
旁通九藝玉立塵表守令高其行年凡七十以疾終  
門人私謚爲文莊先生有澱州漁唱集

### 王宗聖

王宗聖字汝學義烏人也由進士授興化府教授陞  
國子監助教正己率人大司成古冲李公雅重之累  
官福建僉事倭寇猖獗調遣有功歸休築室繡湖之  
濱督學屠公禮聘講學于本邑明倫堂上與邑令趙  
公大河發明經權忠恕之義聞者稱服所著有濱河  
藁五十卷權政記十五卷太極圖跋等書

朱環

朱環義烏人也赤子時無兒啼聲仲父桂無子養爲子已桂生子璧及宗周頗疎環環事之彌謹服勞事不知有寒暑也時境內多盜白晝出道上劫人財桂有金數百兩與璧謀瘞窖中璧夜發之去復誣環桂怒褫環襦袴立之大雪中一日夜環涕泣謝過終無一語辨其冤桂虐使日甚環五六年間瀕死者數矣恒順受無怨言桂死遇璧益厚璧子慶多暴遇死獄環竭力營救卒免之環有子曰元女曰壽元末縉雲盜置砦峽源山將劫環奉之爲謀帥環莫之知也元

聞遽歸走白父當速避環老憚奔走又以謂亡是事  
不聽涕泣請又不聽罵之元度令賊縛翁去誰謂白  
翁非反盜者必殺盜庶有明也伏垣下賊偵騎至立  
殺之以血手入示父負之去未幾台賊獲環亡奴在  
焉吏引環逮之獄時所司方患盜凡盜獄所連逮多  
論死會元病不能起獨視妹而泣妹壽奮自前走法  
曹椽泣訴哀求脫父而歸人稱其世孝云

汪灌

汪灌字慶衍金華西山里人也爲人廉直能急人患  
難人有故叩之卽風雨寒暑不避也鄉里大事官皆



倚之以辦一日念徭役不均而訟訐滋起也聚其鄉人謀曰鄉之人非吾父兄則吾屬子弟也顧隳恩圯義而闕於役者獨憚追胥科繇騷屑之擾焉耳請率里正一歲所須錢長短相覆亡慮費三十萬吾鄉戶各自實其貲爲三等定著之差次於籍而衆哀金以畀當役者從之先後視戶籍金之多寡視等則異時戶有升降則告於衆而進退之如是則名雖直役者聽事而實皆仰給于衆也公無廢事而私可無敗家尚可憚乎願與父兄慮之衆翕然稱善卽日立約束無違者旣又以哀金之難也衆割田百畝爲之約成

登其書於縣而各藏其副於家竣於役而反則會衆  
擊豕醜酒舊里正以田授新里正成禮而退於是  
一鄉之役訟遂絕行三十年矣太守吳公大善之延灌  
等及他父老與爲禮而志其鄉以風歲惡饑民羣起  
爲攘寇以救死守召灌爲畫欲調兵灌曰無以爲也  
此直丐升斗救死耳下片符可致何俟兵乎脫兵出  
則挺而搏矣守乃悟然猶遣巡檢與俱灌止巡檢於  
家飲食之獨以數十輩持符逮至莫不畢集吏覲功  
悉論以死灌詣府伏庭下不起曰是曹束手隨檄來  
未嘗扞法也今以逆論之後復無凶歲乎且灌實召

之灌不忍民聽灌就逮而死也守感悟亟解散其獄  
黥者纔二人其著信如此

徐文敏

徐文敏武義人父早卒母朱遺腹生文敏及長事母  
克盡孝道母患瘋疾文敏百方醫療不痊乃斷暈酒  
每夜叩北辰祈以身代越四年勿懈忽一夕夢老人  
示以方如方劑藥母服而愈鄉人嘆異之其孝老而  
稱篤正德間 朝廷旌其母節後十年知縣張沐核  
其孝行具奏未報而文敏卒其母年逾九十而終

胡擇

胡擇字仁甫蘭溪縣人由舉人歷邵武長沙建昌三  
府通判陞景州知州真定府同知所至廉謹練達人  
以法家老吏稱之致政歸蕭然不自能給而猶兄弟  
讓田產真孝友天性者也

王 晁

王晁字公亮東陽縣人居貧養親誠愛母卒廬墓三  
年知縣張立嘗雪夜往察之果見嗚咽僵卧大加嘆  
賞補俸助之聲稱大著太守劉蒞大書孝行之門旌  
異焉仍復其家丁役

陸 璫

陸璫字溫夫蘭溪縣人也由舉人授萬載知縣愷悌  
有爲豪巨爲盜者璫薙剪不遺力歲饑民多逋負移  
檄交至璫卽自械繫民咸願身代璫曰父老無自苦  
吾寧以此去無忍爾輩流離也勸課學徒撫存孤寡  
皆誠心惻怛後以謗調大庾民痛哭遮留治大庾語  
無躁妄遇事堅執不爲詭隨處劇繁以簡靜愛民禮  
士敦雅有古風陞福建漳州府通判去後民恒思之

### 朱方

朱方字良矩永康人也性樸寔言笑不妄初任丹陽  
尹冰蘖自持聽斷詳慎歷淮安同知刑部員外郎中

寶慶知府操履不踰遷雲南叅政乞致仕當道疏留之竟引疾去程松溪先生出其門終身執弟子禮方亦以師道自居時兩重之云

王世名

王世名婺武義人也年十七時父良爲族侄俊以爭屋毆死世名恐殘父屍不忍就理乃佯聽其輸田議和凡田所入輒易價封識俊有所餽亦佯受之雖鎔銖罔有不計值封識者私繪父像自像帶劒侍置密室朝夕泣拜購一刀銘之報讐字母妻不知也服闋遊邑庠不專事舉子業惟手書忠孝格言一編佩之

已而已子甫數月撫之謂母妻曰吾已有後可以死矣母妻亦不知所謂也一日俊飲於其隣醉歸世名乃迎而揮其所購刃立碎其首以報讐故號於衆歸以白其母遂出其向所封識租價餽值及宿構刃狀赴邑請死實萬曆九年正月也去父死之日六年于茲矣邑陳令驗所封識訪之士民知報父讐是實乃曰此孝子也不可令對獄卒別館之上其事當道當道委金華令汪往訊之世名曰復何言吾事畢矣只欠一死汪曰檢若父屍有傷子未應得死世名曰吾忍痛六年始發者爲何不忍殘父屍也以吾命抵讐

命奚檢爲遂具呈懇乞放歸故里拜父辭母撫子嚙  
妻絕吭柩前獻屍臺下汪憐之遂移文請於郡言世  
名宿抱父冤潛懷壯志強顏與讐同室矢志終不共  
天封買和之貲不遺錙銖鑄報讐之刃懸之繪像就  
理恐殘父屍卽死慮絕親後歲序屢遷剛腸愈烈及  
甫生男一歲謂可從父九原遂揮刃於讐人甘投身  
於法吏驗父若果有傷擅殺應從末減但世名誓不  
毀父屍以生惟求卽父柩而死一檢則世名且自盡  
是世名不檢固死檢亦死也捐生慷慨旣難卒保其  
身而就義從容是宜曲成其志合無放歸故里聽其



自裁當道可其議世名遂得歸歸之日汪囑之曰子  
行吾且來子無卽死吾終不惜爾父旣朽之骨而不  
以全爾孝子仍以死自誓誓不欲檢汪喟然曰浮生  
有涯令名無已世名正色曰豈謂名哉理當如是其  
母迎而泣世名曰身固父所遺也以父之遺爲父死  
雖離母得從父矣復何憾謂妻曰善事若姑善撫若  
子餘無言見武義陳令陳仍館之前館囑守者曰無  
令其死迨汪至武義邑人迎而直世名者千人汪遂  
令昇其父棺棺至世名聞之大慟遂以頭觸地守者  
持之不得死明日邑諸生翼而見汪世名望見父棺

卽以頭觸階石血噴如雨地爲之赤諸生相持大號  
陳汪二令亦不忍視爲之泣數行下諸生請從其志  
汪乃舁其父棺去遺文而弔之世名少甦卽求至灘  
視父棺爲一再慟望弟扶棺登舟久之乃返汪所汪  
且去矣讀所遺文曰汪君知我哉陳令又欲白于上  
免檢其父以全其志世名曰此非法也非法無君何  
以生爲遂不食而死死之日霾霧昏慘烈風迅雷大  
雨如注迨迎屍歸始開霽焉遠近莫不曰真孝子也

補遺

童存德

童存德字居敬蘭谿縣人正統十年進士除廣西道御史巡按北直十四年護駕北征死于土木之難

### 趙志皋

趙志皋浙江蘭谿人隆慶戊辰探花歷官吏部左侍郎入閣歷少傅建極殿大學士兼太子太傅吏部尚書二十九年贈太傅謚文懿志皋在詞林時與江陵忤外謫江陵敗復入詞林神祖以人望所屬不由廷推特起而大用之亦孜孜思有所樹立以報聖恩因動多掣肘不獲盡見所長竟賁志以沒云

### 陸可教

陸可教號葵石蘭谿縣人萬曆丁丑進士改庶吉士授編修庚辰病歸丁艱服除授原職尋轉侍讀戊子主考江西辛卯主考應天所拔多名士而試錄亦膾炙人口歷南禮侍卒文章與馮祭酒夢禎並爲士林珍重馮之品行以超逸稱而可教規旋矩翔屹然自立能不失文懿公軌度云